

Excavacion arqueologico na Santa Cruz

Bishita Museo Arqueologico riba Dia di Betico pa mira e hayazgonan



ARQUEOLOGONAN y asistentnan di arqueologo di Departamento Cientifico di Museo Arqueologico Nacional Aruba (MANA) ta excavando actualmente na e sitio arqueologico na Santa Cruz 35, patras di edificio di notario Tromp. Esaki ta un continuacion di trabounan haci 11 aña pasa riba e mesun sitio arqueologico interesante aki. Bishita MANA otro siman Diaranson dia di Betico y admira hayazgonan sumamente importante y fascinante.

Un di e hayazgonan cu a hala hopi atencion 11 aña pasa, tabata e renchinan di oro di

cual un tin 9 esmeralda y actualmente ta incorpora den sala di exposicion permanente di Museo. Hayazgonan actual ta inclui weso di skelet, marca di staca como tambe otro rastro cual mester di mas investigacion. Dia di Betico 2012 publico por mira hayazgonan mas recien, como tambe otro hayazgonan di 11 aña pasa, manera cralchinan, craneo y partinan di skelet den laboratorio di Departamento Cientifico, un area cu solamente pa e dia aki lo ta habri pa publico por tira un bista.

E sitio arqueologico aki ta hopi importante pa arqueologia di

Aruba pa tres motibo. E ta e unico sitio na Aruba na unda te cu awor a haya artefactonan di oro den un contexto arqueologico. E ta e prome sitio arqueologico di Aruba na unda nos ta haya un bista di e cultura di morto durante e Periodo Historico y e ta e prome sitio arqueologico unda nos por mira e efecto di e contacto entre e Amerindionan di Aruba cu Europeoanonan.

Pa Museo ta hopi importante pa haya e cooperacion necesario pa por haci excavacionnan debidamente y MANA ta hopi agradecido na notario Marion Tromp pa e cooperacion duna

pa por haci e excavacion aki riba su tereno. Alabes ta gradici famia Trimon-Figaroa pa e cooperacion haya 11 aña pasa cu a sigura continuidad di investigacion di e sitio arqueologico asina importante pa historia di Aruba. Tambe ta gradici DOW y Ministerionan di Infraestructura y Cultura pa tur cooperacion haya.

Pa informa publico tocante e trabounan y hayazgonan, Museo a tene un rueda di prensa Diaranson dia 18 di Januari na e sitio, na unda nos Minister di Cultura Michelle Hooyboer-Winklaar tabata presente y

arqueologo y asistent di arqueologo a duna un splicacion. MANA lo keda informa publico via prensa y Facebook (Archeo of National Archaeological Museum Aruba) mientras cu e excavacionnan ta sigui.

Un invitacion ta bay pa un y tur cu ta interesa den historia y cultura di Aruba pa inclui un bishita na Museo Arqueologico su "Open House" na Schelpstraat 42 na Oranjestad, entre 10 di mainta pa 2'or di merdia, como parti di e ruta di e Museo y Galerianan, cu ta habri pa publico na Playa riba Dia di Betico 2012.